

四庫全書

史部

欽定四庫全書

欽定續通志卷五百二十四

孝友傳

宗

李璘

甄婆兒

徐承珪

劉忠孝

呂昇王翰

羅居通

黃德興

齊得一

李罕澄

邢神留

沈正

許祚

李琳鄭彥圭

田祚俞雋

惠從順趙廣

張巨源

劉芳

瞿景鴻

胡仲堯

仲容

陳兢

洪文撫

易延慶

董道明

郭琮

畢瓚

顧忻

李瓊

朱泰

成象

陳思道

方綱

龐天祐

劉斌

樊景溫

榮恕

初暉

何保之

李玘

侯義

王光濟

李群  
周善敏

江白

裘承詢

孫浦  
董孝章

常元紹

王美

朱仁貴

邢濟

趙祚

楊榮

趙友

李居正

張可象

張珪

崔諒

王覺

曹遵

童升

樊可行

元守全

段德

張仁遇

王子上

瞿肅

王世及

李宗祐

劉罔

汪政

李耕

東野宜

寶益

張亿基

間用和

楊忠義

常真

晏

守規

王淦

杜誼

撰

姚宗明

鄧中和

毛安輿

李訪

朱壽昌

侯可

申積中

陳芳

郝戴

支漸

鄧宗古

蘓慶文

臺亨

仰忻

趙伯深

彭瑜

毛洵

李箐

楊慶

陳宗

郭義

申世寧

苟與齡

王珠

顏訥

張伯威

蔡定

鄭德珪

德璋  
鮑宗巖

李璘瀛州河間人晉開運末契丹侵邊有陳友者乘亂殺璘父及家屬三人乾德初璘隸殿前散祇候友為軍小校相遇于京師寶積坊北璘手刃殺友自言復父讐鞠實太祖壯而釋之雍熙中又有京兆鄠縣民甄婆兒母劉為同里董知政擊殺婆兒始十歲後數年稍長泣

謂兄課兒曰大讐不報何用生為時方寒食具酒殺詣  
母墳痛哭歸取條桑斧置袖中往見知政知政方與小  
兒戲婆兒出其後以斧斫其腦殺之事聞太宗嘉其能  
復母讐特貸焉

徐承珪萊州掖人幼失父母與兄弟三人及其族三十  
口同甘藜藿衣服相讓歷四十年不改其操所居崇善  
鄉緝俗里木連理瓜瓞異蔓同實州以聞乾德元年詔  
改鄉名義感里名和順承珪嘗為贊皇令

劉孝忠并州太原人母病三年孝忠割股肉斷左乳以食母母病心痛劇孝忠燃火掌中代母受痛母尋愈後數歲母死孝忠傭為富家奴得錢以葬富家知其孝行養為已子後養父兩目失明孝忠為舐之七日復能視劉鈞聞而召見署宣陵副使開寶二年太祖親征太原召見慰諭又萊州人呂昇父權失明剖腹探肝以救父疾父復能視而昇不死冀州南宮人王翰母喪明翰自抉右目睛補之母目明如故淳化中並下詔賜粟帛

羅居通益州成都人母死廬墓三年有甘露降墳樹芝草生其旁開寶四年長吏以聞詔以居通為延長主簿大中祥符初資州人黃德興葬父母負土成墳甘泉湧其側降詔旌表

齊得一密州諸城人晉末皇甫暉為密州防禦使得一父為客將及暉叛歸淮南屢率衆剽劫于故鄉得一家被掠殆盡後王萬敢為防禦使性貪暴執鄉民十八家責其嘗以牛酒餽賊盡殺之而取其資產得一親屬死



者十餘人惟得一與兄脫身獲免明年詣闕上訴朝廷遣使按鞫之得實萬敢削官判官胡輒坐死開寶中詔郡國舉廉退孝悌之士本郡即以得一應詔至闕策試中選授章丘主簿

李罕澄冀州阜城人七世同居漢乾祐三年詔改鄉里名及旌其門閭太平興國六年長史以漢所賜詔書來上復旌表之

邢神留涿州陸澤人父超逋官租里胥督租與闕毆里

胥死神留年十六詣吏求代父死州以聞特詔減死瑞拱初泰州海陵人沈正父為屯田院衙官凶暴無賴使酒毆平人死正中塗見父恐懼述其故正即號呼褓衣就毆其屍巡警者捕送官獄具怡然就刑聞者悲之

許祚江州德化人八世同居長幼七百八十一口太平興國七年旌其門閭淳化二年本州言祚家春夏常乏食詔歲貸米千斛又有信州李琳十五世同居貝州田祚京兆惠從順十世同居廬州趙廣順安軍鄭彥圭信

州俞雋八世同居陝州張文裕六世同居襄州張巨源  
劉芳潭州瞿景鴻溫州陳侶江陵褚彥逢五世同居徐  
州彭程四世同居皆賜詔旌表門閭巨源素習法律太  
平興國五年賜明法及第坊淳化四年來賀壽寧節賜  
進士出身侶事母至孝賜其母粟帛彥逢兄弟五人皆  
年七十餘至道元年轉運使表其事詔補彥逢教練使  
胡仲堯洪州奉新人累世聚居至數百口構學舍于華  
林山別墅聚書萬卷大設廚廩以延四方遊學之士南

唐時嘗授寺丞雍熙二年詔旌其門閭淳化中州境旱  
歉仲堯發廩減市直以賑饑民又以私財造南津橋太  
宗嘉之除本州助教許每歲以香稻時果貢于內東門  
仲堯稍遷國子監主簿致仕卒仲容字咸和咸平三年  
復至闕貢土物改大理評事建本縣孔子廟後遷光祿  
丞致仕天禧中卒

陳兢江州德安人陳宜都王叔明之後叔明五世孫蕪  
唐右補闕蕪生京祕書少監集賢院學士無子以從子

褒為嗣褒至鹽官令褒生灌南安丞灌孫伯宣居德安以著作佐郎召不起伯宣子崇為江州長史益置田園為家法戒子孫擇羣從掌其事建書堂教誨之僖宗時嘗詔旌其門南唐又為立義門免其徭役崇子衮江州司戶衮子昉試奉禮郎昉家十三世同居長幼七百口不畜僕妾上下姻睦人無間言每食必羣坐廣堂未成人者別為一席有犬百餘亦置一槽共食一犬不至羣犬亦皆不食建書樓于別墅延四方士肄業者多依焉

開寶初平江南知州張齊賢上請仍舊免其徭役從之  
昉弟子鴻太平興國七年江南轉運使張齊賢又奏免  
雜科稅即鴻之弟淳化元年知州康戩又上言稅家常  
苦食不足詔本州每歲貸粟二千石後稅死其從父弟  
旭每歲止受貸粟之半云省嗇而食可以及秋成屬歲  
儉穀貴或勸其全受而糴之可邀善價旭曰朝廷以旭  
家千口軫其乏食貸以公粟豈可見利忘義為罔上事  
乎大中祥符四年為江州助教卒弟蘊主家事天聖元

年繼為助教卒弟泰主之泰弟度太子中舍致仕從子延賞可並舉進士延賞職方員外郎

洪文撫南康建昌人曾祖諤唐虔州司倉參軍子孫衆多以孝弟著稱六世義居室無異爨就所居雷湖北創書舍招徠學者至道中本軍以聞遣內侍裴愈齎御書百軸賜其家文撫遣弟文舉詣闕貢土物為謝太宗飛白一軸曰義居人以賜之命文舉為江州助教三年又詔表其門閭自是每歲遣子弟入貢必厚賜答之文撫

兄子待用登咸平二年進士第至都官員外郎

易延慶字餘慶筠州上高人父贊以勇力事南唐至雄  
州刺史延慶以父蔭為奉禮郎顯德四年周師克淮南  
贊歸朝授道州刺史延慶亦授大名府兵曹參軍後為  
大理評事知臨淮縣乾德末贊卒葬臨淮延慶居喪摧  
毀廬墓側手植松柏數百本旦出守墓夕歸侍母墓側  
生紫芝玉芝服闋以母老稱疾不就官母卒從藁殯數  
年出為大理寺丞嘗司建安市征以私歸葬其母為知



軍扈繼昇所劾坐免復廬墓側數年母平生嗜栗延慶  
樹二栗樹墓側二樹連理後知瑞州卒子綸大中祥符  
元年進士及第

董道明蔡州褒信人母死出葬道明潛匿墓中人瘞之  
經三日家人發冢取之道明無恙終身廬于墓側

郭琮台州黃巖人幼喪父事母極恭順娶妻有子移居  
母室凡母之所欲必親奉之居常不過中食絕飲酒茹  
葷三十年以祈母壽母年百歲耳目不衰飲食不減鄉

里異之至道三年轉運使以聞詔表門閭除其徭役明年母無疾而終琮哀號幾絕鄉閭率金帛助葬又有越州應天寺僧者幼貧無以養母剃髮乞食以給晨夕母年一百五歲而終潭州長沙人畢贊仕郡為引贊吏性至孝父母皆年八十餘轉運使表其事詔贊解職終養顧忻秦州泰興人十歲喪父以母病葷辛不入口者十載雞初鳴具冠帶率妻子入母室問所欲如此五十年未嘗離左右母老目不能覩物忻日夜號泣祈天母目

忽明燭下能縫紉九十餘無疾而終又有杭州仁和人  
李瓊以鬻繒為業事母孝夜嘗十餘起省母母喜食時  
新瓊百方求市得之

朱泰湖州武康人家貧鬻薪養母常適數十里外易甘  
旨以養母泰服食粗糲戒妻子常候母色一日雞初鳴  
入山遇虎搏攫負之而去泰已瞑眩行百餘步忽稍醒  
厲聲曰虎為暴食我所恨母無託爾虎忽棄泰于地泰  
匍匐而歸鄉里聞其孝感率金帛遺之目為朱虎殘

成象渠州流江人以詩書訓授里中母病割股肉食之  
淳化中李順盜據郡縣象父母驚悸死燼骨寄浮屠舍  
象號泣營葬廬墓側以衰服襟袂篩土于墳上日三斗  
虎豹環廬而卧象無畏色燕百餘集廬中禾生墓側吐  
九穗服終猶未還家知禮者為書以諭之乃歸教授遠  
近目為成孝子

陳思道江陰人喪父事母兄以孝悌聞鬻鹽市側以給  
晨夕母病思道衣不解帶者數月雙目瘡爛飲食隨母

多少洎母喪水漿不入口七日既葬哀驚醢之利得錢十萬奉其兄結廬墓側日夜悲慟其妻時攜兒女詣之拒不見白兔馴狎虎豹環廬而卧咸平元年知軍上其事詔賜束帛旌其門

方綱池州青陽人八世同爨家屬七百口居室六百區每旦鳴鼓會食常出稻五千筭賑貸貧民景德二年轉運使以聞詔旌其門天禧中安撫使還言綱家稅籍錢四百餘千米二千五百斛同居四百年而本縣科率一

無寬假望蠲其戶雜科詔從之

龐天祐江陵人以經籍教授里中父疾天祐割股肉食之疾愈又病目喪明天祐號泣祈天舐之父年八十餘卒天祐負土封墳結廬其側晝夜號不絕聲知府陳堯咨親往致奠上其事詔旌表門閭

劉斌定州人父加友端拱中為從弟志元所殺斌兄弟皆幼隨母改適人母嘗戒之曰爾等長必復父仇景德中斌兄弟挾刃伺志元于道刺之不殊即詣吏自陳用

具獄上請詔志元黥面配隸汝州釋斌等罪

樊景溫陝州芮城人榮恕旻雄州歸信人兄弟異居積  
年大中祥符中景溫樛樹五枝并為一恕旻家榆樹兩  
本自合兩家感其異復義聚鄉人稱雍睦

初暉字坦之萊州膠水人淳化三年進士歷度支員外  
郎直集賢院天禧中出知濰州母卒葬于州城南暉既  
解官就墳側構小室號泣守護蔬食經六冬墮足二指  
有白鳥兔馴擾墳側州人異之以狀聞詔賜粟帛令長

吏每月存問

何保之梓州通泉人母卒負土成墳廬于其側日有羣  
鳥飛集墳上哀鳴不去又常有兔馴于坐隅人稱異焉  
大中祥符間降詔旌恤

李玘大名宗城人性篤孝力耕事母母卒讓田與弟堅  
廬于墓所晝夜號泣負土築墳又以二代及諸族父母  
藁葬者盡禮築之凡三年成六墳留守三年天禧中知  
府張知白以狀聞詔賜粟帛令府縣安存之里中有母



在而析產者聞玘被旌兄弟慚懼復相率同居

侯義應天府楚丘人貧無產傭田事母母卒義力自辦葬不掩墳壙晝則負土築墳夜則慟哭柩側妻子困匱不給田主哀憐之資以餽糧踰年墳間瓜異蒂木連理嘗遇盜劫其衣服既而知是義物悉還之

王光濟廬州人喪母因刻像日夕奉事如平生孝道純篤咸平二年本州以孝聞有詔旌之時又有徐州豐人李祚親喪廬墓側二十七年益州雙流人周善敏喪父

廬墓側母病又割股肉以進遂愈大中祥符九年特詔  
旌表祚賜善敏粟帛存慰之

江白建昌人景德二年進士父禹錫卒白自鄣尉罷還  
負土營葬廬墓側藜羹芒屨晝夜號泣將終制猶然轉  
運使以狀聞詔賜粟麥酒帛

裘承詢越州會稽人居雲門山前十九世無異饗子弟  
習絃誦鄉里稱其敦睦州以聞詔旌其門閭咸平後又  
有保定軍孫浦襄州常元紹蔡州王美解州董孝章並

十世同居莫州高珪永定軍朱仁貴潞州邢濬相州趙  
祚八世同居麟州楊榮隰州趙友開封李居正潁州張  
可象衛州張珪滄州崔諒七世同居邢州王覺趙州曹  
遵六世同居兗州童昇陳州樊可行京兆元守全平定  
軍段德五世同居開封張仁遇亳州王子上建昌軍瞿  
肅四世同居又河陰王世及大名李宗祐陳州劉閏宣  
州汪政潭州李耕或聚居至七百口累數十百年並所  
在請加旌表詔從之仍蠲其課調大中祥符初東封泰

山判兗州王欽若言曲阜東野宜乾封竇益合居五六  
世有節行四年祀汾陰考制度使馬起言陝州張化基  
閻用和楊忠義聚族累世孝弟可稱並即行在所降詔  
褒美各優賜粟帛

常真陳州項城人父母死廬墓終喪負土成墳不茹葷  
血周廣順中詔旌其門閭開寶七年本州以聞詔再加  
旌表真妻病子晏割股肉養母及死次子守規徒跣日  
一食廬墓三年太平興國八年詔旌表之又有齊州王

汝河南李繼成滄州胡元興並母死負土成墳晝夜哭  
不絕聲州郡繼以聞皆降詔旌其門閭賜以粟帛

杜誼字漢臣台州黃巖人喪父母號慟晝夜不絕勺水  
不入口者累日卜葬徒跣負土為墳往來十餘里日渡  
塘間泥水沒胫雖大雨雪不少止手足皸裂血流以漆  
塗之每覆一畚必三遠墮號而後去既葬爰舍墓旁負  
土終喪邑大水民居廬墓漂壞甚衆獨不及誼邑人狀  
其事以聞詔書嘉獎後以祖垂衆廢入官至贊善大夫

嘗知永城縣歲捐俸錢三十萬以收瘞汴渠之溺死者  
又出俸錢率其下新文宣王廟兩旁為學舍數十區旦  
夕講學于其堂以通判梓州卒子揆纔十六歲哭誼墓  
旁卒

姚宗明河中永樂人十世祖棲雲當唐貞元中調卒戍  
邊棲雲之父語其兄曰兄嗣未立可無往某幸有子請  
代兄行遂戰沒塞上時棲雲方三歲其母再嫁棲雲養  
于伯母既長事伯母如母伯母亡葬之又招魂葬其父

乃廬于父墓終身哀慕不衰河中尹渾瑊上其事詔表其門名其鄉曰孝悌社曰節義里曰敬愛樓雲生岳岳生君儒君儒生師正自岳至師正四世廬墓五世孫厚六世雅七世文八世敬真九世直十世宗明當慶厯初有司以姚氏十世同居聞于朝仁宗詔復其家十一世孫用和十二世孫士明十三世孫德自宗明至德又三世自慶厯以後又五十餘年而其家孝睦不替姚氏世為農家無為學者家不甚富有田數十頃聚族百餘人子

孫躬事農桑僅給衣食歷三百餘年無異辭者經唐末五代兵戈亂離而子孫保守墳墓骨肉不相離散求之天下未或有焉

鄧中和字祖德開封長垣人舉三禮景祐慶厯間喪親負土成墳廬墓終喪定省往來如事生者二十年

毛安輿嘉州洪雅人九歲父死負土為墳廬于其側三年知益州張方平聞之遺以酒餼狀其事以聞

李訪韶州人業進士廬父母墓有虎暴傷旁人而不近



訪又有白鳥集墓上

朱壽昌字康叔揚州天長人以父娶蔭累官權知岳州  
州濱湖多盜壽昌籍民船刻著名氏使相伺察盜發驗  
船所向窮討之盜少弭旁郡取以為法富弼韓琦為相  
擇壽昌使湖南或言邵州可置冶采金者有詔興作壽  
昌言州近蠻金冶若大發蠻必爭自此邊境恐多事且  
廢良田數百頃非敦本抑末之道也詔亟罷之知閬州  
大姓雍子良殺人賂其里民出就吏獄具壽昌覺其姦

引囚詰之曰吾聞子良與汝錢十萬許納汝女為婦且  
壻汝子故汝代其命有之乎囚色動又摘之曰汝且死  
書券抑汝女為婢指錢為顧直又不壻汝子將奈何囚  
悟泣涕覆面曰幾悞死以實對立取子良正諸法郡稱  
為神知廣德軍壽昌母劉氏癸妾也癸守京兆劉氏方  
娠而出壽昌生數歲始歸父家

案東都事畧作壽昌生  
七歲父守長安出其母

劉氏嫁民間  
與此互異

母子不相聞五十年行四方求之不置飲

食罕御酒肉言輒流涕用浮屠法灼背燒頂刺血書佛

經力所可致無不為者熙寧初與家人辭訣棄官入秦  
曰不見母吾不返矣遂得之於同州劉時年七十餘矣  
嫁党氏有數子悉迎以歸京兆錢明逸以其事聞詔還  
就官壽昌以養母故求通判河中府數歲母卒壽昌居  
喪幾喪明既葬有白鳥集墓上拊同母弟妹益篤又知  
鄂州提舉崇禧

東都事  
畧作崇禧

觀累官司農少卿易朝議大

夫遷中散大夫卒壽昌勇于義周人之急無所愛嫁兄  
弟兩孤女葬其不能葬者十餘喪天性如此

侯可字無可華州華陰人少倜儻不羈既壯篤志為學  
隨計入京里中劇金驢行比還悉散其餘與同舉者曰  
此金鄉里所以資應詔者也不可以為他利且行聞鄉  
人病念曰吾歸則彼死矣遂留不去病者瘡輟已馬載  
之徒步而歸孫沔征儂獍請參軍事奏功得官知巴州  
化城縣巴俗尚鬼而廢醫唯巫言是用娶婦必責財貧  
人女至老不得嫁可為約束立制度變其習再調華原  
主簿郡吏趙至誠貪橫可暴其罪言于大府誅之簽書

儀州判官西夏寇邊使者使可按視即以十數騎涉夏境猝與遇亟分其騎為三四令之曰建爾旗幟旋山徐行夏人疑為誘騎不敢擊韓琦鎮長安薦知涇陽縣說涓源羌酋輸地八千頃因城熟羊以撫之又議復鄭白渠得召對旋以微罪罷官至殿中丞卒于家可輕財樂義與田頌為友頌病重千里求醫未歸而頌死目不瞑人曰其待侯君乎且斂而可至拊之乃瞑頌無子不克葬可辛勤百營鬻衣相役卒葬之方天寒單衣以居有

餽白金者顧顏之妹處室舉以佐其奩具一日自遠  
歸家以寢告適友人郭行扣門曰吾父病醫邀錢百  
千賣吾廬而不售可惻然計橐中裝畧當其數盡與  
之關中稱其賢

案宋史原作孝義故侯可以恤鄉人  
病篤友誼亦得附傳于推廣孝友錫

類之義無害  
今並存之

申積中成都人襁褓中楊繪從其父起求之為子及  
長知非楊氏而絕口不言年十九登進士第事所養  
父母盡孝終身有二弟一妹為畢婚娶始歸本族復

為申氏蜀人以純孝歸之政和六年以奉議郎通判  
德順軍翰林學士許光凝嘗守成都得其事薦諸朝  
召赴京師擢提舉永興軍學事道卒初光凝所同薦  
者三人其一河陽故大理丞陳芳一門十四世同居  
三百年一鄧州王襄經術登科事孀嫂如母養孤甥  
如子教誨後進賙恤鄉里貧民以學行稱乞加獎異  
詔表芳門閭賜襄號處士

郝戡字伯牙石州定胡人家貧竭力營養或憐傷之

貸以錢數百萬使取息自贍戴重謝留錢五六年不用復返之舉進士調宛丘尉舞陽主簿通山令時年未五十以父樵老不第上書請致仕為父求官執政諭使赴官而後請曰如是則可升朝籍遇恩及親矣于是留妻子于家獨奉父行踰歲竟謝事上官以其治縣有績惜其去固留之耆老拜庭遮道皆不能止得太子中允以歸未至鄉里而樵卒自畚土造冢服除州以狀聞詔賜粟帛治平末以呂公著薦起為奉寧軍推官涇原經畧使



亦奏辟幕府戴曰向所以未老致仕欲官及親也既不  
能及尚庶幾以恩得贈今則無及矣姻族語其妻聶氏  
使勸戴聶曰吾不德無以助君子矧敢強其所不欲以  
累其高哉聶事舅姑亦以孝義著戴篤行苦節以終

支漸資州資陽人年七十持母喪既葬廬墓側負土成  
墳蓬首垢面三時號泣哀毀瘠甚鄉人旬文昀自娶婦  
即與父母離居覩漸至行深自悔責號慟而歸孝養盡  
志鄉閭觀感而化者甚衆鄧宗古簡州陽安人父死自

培土為墳廬其側晨夕號慟甘露降于墓木里中號為  
鄧孝子沈宣汝州梁人母亡既葬不塞墓門三十有六  
月晝負土夜拊棺而卧妻高氏亦有孝行漸以下三人  
元豐中皆褒賜粟帛

蘇慶文臺亨皆夏縣人慶文事父母以孝聞母少寡慶  
文懼其妻不能敬事每戒之曰汝事吾母少不敬必逐  
汝妻奉教母得安其室終身亨工畫元豐中朝廷修景  
靈宮調天下畫工詣京師選試其優者待詔翰林畀以

官祿亨名第一以父老固辭歸養閭里賢之

仰忻字天貺溫州永嘉人力學以篤行稱年五十餘執  
母喪盡孝禮躬自負土廬墓側有慈烏白竹之瑞紹聖  
中郡守楊蟠表其里孝廉坊大觀二年以行取士郡以  
忻應詔未幾卒特贈將仕郎

趙伯深字逢原父子侂宣和間為棣州兵官屬會兵動  
燕雲子侂被檄往塞上伯深時尚幼與其母張留居棣  
州既而金人渡河伯深母子相失子侂亦隔絕建炎二

年始得南歸子偁卒伯深訪尋其母三十餘年一旦聞  
在瀘南伯深徒步入蜀間闖累年紹興二十一年乃得  
其母又彭瑜字君玉吉之安福人熙寧間失其母瑜朝  
夕焚香祈天願知母所在如是十餘年俄有人言母為  
泰和倪氏婦瑜竟迎以歸

毛洵字子仁吉州吉水人天聖二年進士又中拔萃科  
性至孝凡守四官再以親疾解任執藥調膳嘗而後進  
三月不之寢室父母繼卒持鍤荷土以為墳手胝面黥

親友不能識廬于墓凡二十一月朝夕哭踊食裁脫粟  
諸生請問經義對之流涕未嘗言文抱疾歸數日而卒  
郡以孝聞賜其家米帛兄溥字文祖亦以哀毀卒于舟  
中李箐者洵同縣人字彥良與弟衡字平國生同乳二  
歲喪母十歲喪父兄弟每以不逮事親為恨政和中改  
葬其母于楊山負土成墳廬于墓左產木一本兩榦高  
丈許復合于一至末乃分兩榦五枝鄉人以為瑞楊芾  
者亦同縣人字文卿性至孝歸必市酒肉以奉二親未

嘗及妻子紹興五年大饑為親負米百里外遇盜奪之不與盜欲兵之芾慟哭曰吾為親負米不食三日矣幸哀我盜義而釋之

楊慶鄞人父病貧不能召醫乃剗股肉啖之良已其後母病不能食慶取右乳焚之以灰和藥進焉入口遂差久之乳復生紹興十二年詔表其門

陳宗永嘉人年十六母蔡病篤剗股為餌病愈已而復病不救宗一慟而絕

郭義興化軍人早遊太學以操尚稱年四十餘客錢塘  
間母喪徒跣奔喪每一慟輒嘔血家貧甚故人有所饋  
不受聚土為墳手蒔松竹而廬于其旁甘露降于墓上  
烏鵲馴集郡上其事詔旌表其閭

申世寧信州鉛山人紹興六年潘達兵襲鉛山父俞年  
七年未及出戶遇賊賊意其有藏金欲殺之世寧年未  
冠亟引頸願代父死賊感其孝兩全之

苟與齡字壽隆滁州來安人志尚高潔事其親生養死

葵力竭而禮盡鄉黨稱之母歿廬墓側有芝十九莖生于墓亭郡縣以事聞旌其門

王珠字仲淵吉州龍泉人以孝謹聞建炎間居父憂芝數本生墓側倒植竹以為扶復生柯葉紹興間再罹母喪復有雙竹靈芝之祥

顏詡唐太師真卿之後真卿嘗謫廬陵故詡為吉州永新人詡少孤兄弟數人事繼母以孝聞一門千指家法嚴肅男女異序少長輯睦匝架無主厨餽不異義居數



十年終日怡愉家人不見其喜愠年七十餘卒

張伯威大安軍人紹熙元年武舉進士調神泉尉祖母黃年九十八不忍之官黃得血痢疾瀕殆伯威剔左臂肉食之遂愈繼母楊因姑病篤驚而成疾伯威復剔臂肉作粥以進其疾亦愈伯威妹嫁崔均其姑王疾妹亦剔左臂肉作粥以進達旦即愈知大安軍羅植即伯威所居立純孝坊崔均所居立孝婦坊事聞詔伯威與升擢倍賜其妹束帛

蔡定字元應越州會稽人父革依郡獄吏傭書以生資  
定使學遊鄉校稍稍有稱郡獄吏一日坐舞文法被繫  
革以註誤年七十餘矣法當免繫鞠胥任澤削其籍年  
而入之罪且與獄吏等案具府奏上之方待命于朝故  
俱久囚而革不得獨決定數詣府號愬請代坐獄弗許  
請效命于戎行弗許請隸伍符為兵又弗許定知父終  
不可贖乃謀死以感動有司于是預為志銘其墓又為  
狀若詣府者結置袂間皆敘陳致死之由冀其父之必

免建炎元年十二月甲申自赴河死府帥聞之立命出  
革厚為定具棺斂事而撫周其家

鄭德珪婺州浦江人四世祖綺善讀書通春秋穀梁學  
以肅睦治家九世不異爨德珪與弟德璋孝友天至晝  
則聯几案夜則同衾寢德璋素剛直與物多迕宋亡仇  
家陷以死罪當會逮揚州德珪哀弟之見誣乃陽謂曰  
彼欲害吾也何預爾事我往則姦狀白爾去得不死乎  
即治行德璋追至諸暨道中兄弟相持頓足哭爭欲就

死德珪默計沮其行遂紹以無往夜將半從間道逸去  
德璋復追至廣陵德珪已斃于獄德璋聞之痛絕者數  
四負骨歸葬廬墓再期德珪之子文嗣幼病僂德璋鞠  
之如已子

案本傳宋史原目作鄭綺今因其敬德珪兄弟事為多改作鄭德珪傳附載德璋謹識

有鮑宗巖者字傅叔徽州歙人子壽孫字子壽宗末盜  
起里中宗巖避地山谷間為賊所得縛宗巖樹上將殺  
之壽孫拜前願代父死宗巖曰吾老矣僅一子奉先祀  
豈可殺之吾願自死盜兩釋之

欽定續通志卷五十四

欽定四庫全書

欽定續通志卷五百二十五

孝友傳

金

溫特溫鄂勒博

陳顏

耶律安禮

劉瑜

孟興

王震

劉政

溫特溫鄂勒博西北路松科碩碩歡明安人年十五居

父喪不飲酒食肉廬於墓側母疾刲股肉療之疾愈詔  
以為護衛

陳顏衛州汲縣人世業農父光宋季擢武舉第調壽陽  
尉未赴值金兵取汴光病圍城中顏間關渡河往省因  
扶疾北歸又為家奴瑪哩布哈誣與賊通繫獄撈掠不  
勝因自誣服顏詣郡請代父死太守徐某哀之不敢決  
適帥臣至郡以其狀白帥曰此真孝子也遂併釋之天  
會七年詔旌表門閭

耶律安禮本名納罕系出約尼氏幼孤事母以孝聞遼  
季間闕避難未嘗一日怠溫清入朝當路者重其行義  
使主帥府文字授左班殿直天眷初從元帥於山西母  
喪不克歸葬主帥憐之賻禮甚厚安禮冒大暑挽柩行  
千餘里哀毀骨立行路嗟嘆服除由行臺吏禮部主事  
累遷工部侍郎改左司郎中天德間罷行臺尚書省入  
為工部侍郎累遷本部尚書貞元二年四月為宋國生

日使

按交聘表載耶律安禮使宋在貞元二年四月非  
天德之冬也其奉使為賀生日亦非歲元考宋史



高宗紀亦云質天中節與表相符本傳作天被詔治鞠  
總明年冬為宋國歲元使應係訛誤謹改正

韓王亨獄于廣寧亨無反狀安禮還奏海陵怒疑安禮  
為宗弼故吏乃遣再往與李老僧鞠之老僧由是殺亨  
於獄改吏部尚書護大房山諸陵工作拜樞密副使封  
譚國公遷尚書右丞進封郕國公轉左丞密諫伐江南忤  
海陵意罷為南京留守封溫國公安禮長於吏事廉謹  
自將從帥府再伐宋實貨人口一無所取貴為執政奴  
婢止數人皆有契券時議賢之

我耶律安禮間闕奉母  
千里挽柩孝行篤至金

史舊係列傳

今改錄于此

劉瑜棣州人家貧母喪不能具葬乃質其子以給喪事

明昌三年詔賜粟帛復其終身

孟興蚤喪父事母孝謹母沒喪葬盡禮事兄如事其父

明昌三年詔賜粟帛

王震寧海州文登人為進士學母患風疾刲股肉雜飲食  
中疾遂愈母沒哀泣過禮目生翳服除不療而愈皆以  
為孝感所致特賜同進士出身詔尚書省擬注職任

劉政洛州人性篤孝母老喪明政以舌舐母目逾旬  
忽能視母疾晝夜侍側衣不解帶剗股肉啖之者再三  
母死負土起墳鄉鄰欲佐其勞政謝之廬墓三年防禦使  
以聞除太子掌飲丞

欽定續通志卷五百二十五

欽定四庫全書

欽定續通志卷五百二十六

孝友傳

元

王閏

郭道卿

佐卿廷輝

蕭道壽

郭格格

張閏

萬世通丁煦

向存義

田改住

王珠簡

甯珠赫

李嘉努朱天祥

管如林

布延蘓達勒

尹夢龍

樊淵

賴祿孫

劉德泉

朱顯

朱汝諧

吳思達

郭回

孔全

張子夔

陳乞免

趙國安

張琛

齊哩克岱

楊一

張本

張慶

趙毓

胡光遠

龐遵

陳韶孫

李忠

吳國寶

李茂

羊仁

黃覺經

李鵬

章卿孫

趙一德

王思聰

徹辰台

王初應

施合德

鄭文嗣

大和

王薦

郭全

劉德

瑪雅哈

楊皞

丁文忠 文孝

邵敬祖 李彥忠 譚景星

扈鐸

孫秀實 賈進 宗祀

趙榮

吳好直 柴郁 陳舜咨 余丙

徐珏

尹莘 孫希賢 卜勝榮 劉廷讓

劉通

黃鑑 丁祥一

張旺舅 張思孝

杜佑

長壽 梁威遜 高中 齊哩克 武進

孫瑾

吳希曾

張恭 訾汝道

王庸

黃贊 石明三

劉琦

劉源

祝公榮

陸思孝

姜兼

胡伴侶

王士弘

何從義

阿都齊

高必達

曾德

靳昂

黃道賢

史彥斌

張紹祖

李明德

張緝

魏敬益

湯霖

孫抑

石永

王克己

劉思敬

呂祐

周樂

王閨東平須城人父素饒於財垂老費且盡不甘淡薄  
閨朝夕勤苦入市營奉無闕父性愎多戾閨左右承順  
甚得其歡心及父疾夜燃長明燈室中火延籬壁閨聞  
驚起馳救火已熾烟燄蔽寢戶閨突入火中解衣蒙父  
抱而出肌體灼爛而父無少傷一女不能救遂焚死中  
統二年復其役

郭道卿興化莆田人四世祖義重至孝宋紹興間詔旌



之鄉里為立孝子祠至元初閩盜起居人竄匿道卿與弟佐卿獨守孝子祠不去俱被執盜將殺其弟道卿泣曰吾有兒已長弟弱子幼請代弟死佐卿亦泣曰吾家事賴兄以理請殺我道卿固引頸受刃盜相顧曰汝孝門兄弟若此吾何忍害兩釋之道卿年八十子廷煒為建寧路平準庫使辭歸侍養道卿嘗病疝危甚廷煒憂瘁扶護一夕髮盡白

按元典章載至大元年詔旌其門曰世守孝義

有司言狀

旌之

蕭道壽京兆興平人家貧鬻鍼以自給母年八十餘道  
壽事養盡禮每旦俟母起夫婦親侍盥櫛日三飯必侍  
母食然後退就食至夕必待母寢然後退就寢出外必  
以告母許乃敢出母怒欲撻之即自進杖伏地以受杖  
足母命起乃起起復再拜謝違教拱立左右俟色喜乃  
退母嘗有疾醫累歲不能療道壽刲股肉啖之而愈至  
元八年表其門

郭格格平陽翼城人父寧為欽察先鋒使首領官戍大

良平宋將史太尉來攻陷之寧全家被俘史將殺寧格  
格年五歲告史曰勿殺吾父當殺我史驚曰五歲兒能  
為是言吾當全汝家即以騎送寧等往合州遇蒙古兵  
騎驚散寧家俱得還御史以事聞命旌之

張閏延安延長縣人隸軍籍八世不異爨家人百餘口  
無間言日使諸女諸婦各聚一室為女紅工畢斂貯一  
庫室無私藏幼稚啼泣諸母見者即抱哺一婦歸寧留  
其子衆婦共乳不問孰為己兒兒亦不知孰為己母也

閔兄顯卒即以家事付姪聚聚辭曰叔父行也叔宜主之閔曰姪宗子也姪宜主之卒以付聚至元二十八年與蕪湖芮世通十世同居峽州向存義汴梁丁煦八世同居並加旌焉

田改住汶上人父病不能愈禱於天去衣卧冰上一月同縣王珠爾母病卧冰上半月

甯珠赫山丹州人母年七十餘患風疾藥餌不效珠赫割股肉進啖遂愈歲餘復作不能行珠赫手滌溷穢護

視甚周造板輿載父母昇行園田以娛之潭州萬戶伊喇瓊子李嘉努九歲母病醫言不可治李嘉努剗股肉煮糜以進病乃痊撫州路總管管如林潭州民朱天祥並以母疾剗股旌其家

布延蘓達勒默呼氏家秦州父喪廬墓次晝夜悲號有飛鳥翔集墳土湧起又有尹夢龍中興人母喪負土為墳結廬居其側手書孝經千餘卷散鄉人讀之有羣鳥集其家樹

樊淵建康句容人幼失父事母篤孝至元十二年奉母  
避兵茅山兵至欲殺其母淵抱母號泣請以身代兵兩  
釋之江東廉訪使者辟為吏母亡奔喪哀感行路服闋  
奉神主事之起居飲食十年如平生臺憲交薦淵不忍  
去墳墓終不起延祐間汀州寧化人賴祿孫母病值蔡  
五九作亂負母從邑人避南山盜至衆散走祿孫守母  
不去盜將刃其母祿孫以身翼蔽曰寧殺我勿傷吾母  
盜義而舍之有掠其妻者衆責之曰奈何辱孝子婦使

歸之事聞並賜褒表

劉德泉汴梁杞縣人早喪母父榮再娶生二子俱幼德泉力撫之及繼母病卒益相友愛至元末歲飢父欲使析居德泉泣止不能得乃各受其業以去久之父卒兄弟相約同爨和好如初真定朱顯自至元間其祖父已分析至顯念姪等幼無恃謂弟耀曰父子兄弟本同一氣可異處乎乃會拜祖墓下取分券焚之復與同居蔚州吳思達兄弟六人嘗以父命析居思達為開平縣主

簿父卒還家治葬畢會宗族泣告其母曰吾兄弟別居  
十餘年矣今多破產以一父之子忍使苦樂不均耶即  
以家財代償其逋更復共居母卒哀毀甚它後柳連理  
人以為友義所感又有朱汝諧濮州人父子明嘗命與  
兄汝弼別產父卒汝弼家盡廢汝諧泣請共居仲父子  
昭子玉貧病汝諧迎至家奉湯藥甘旨甚謹後卒喪葬  
盡禮州縣各以名聞表其閭

郭回邵武人素貧年六十無妻奉母寄宿神祠中營養



甚艱母年九十八卒回傭身得錢葬之每旦詣墳哭祭十四年不輟州上狀命給衣糧贍濟仍表異之

孔全亮州鹿邑人父成病刲股肉啖之愈後卒廬墓左負土為墳日六十肩三年起墳廣一畝高三丈餘張子夔安西人父喪每夜半以背負土肘膝行地匍匐至葬所篩土為墳陳乞兒歸德夏邑人年九歲母喪哀毀親負土為墳高一丈廣十六步又有娥眉趙國安解州張琛南陽李廷瑞息州伊喇巴延南陽齊哩克岱皆居喪

有至行廬墓次負土為墳並以有司所請表異之

楊一懷孟人憐其叔家貧密以分契詣神祠焚之同居三十年無間言張本荏平人篤孝事伯父叔父皆甚謹伯父嘗病本晝夜不去側張慶真定人善事繼母伯父泰異居河南慶聞其貧迎歸養之供膳豐備過於所生元善大名人父有昆弟五人因貧流散江淮久之客死至大四年善往尋其骸骨并迎弟姪等一十五喪而歸改葬祖父母以諸喪序列柩於塋次州縣以聞並旌其

家

趙毓唐州人父福遷鄭之管城其先三世同居毓官福州司獄滿歸以母老不復仕一日會諸弟泣申遺訓願世世無異處自是大小百口同力合作家道日殷長兄瑞早卒嫂劉氏守志毓率家人事之甚恭次兄選繼沒嫂王氏毓母以其少許歸改嫁王氏曰婦無再嫁之義願終事姑孝友節義萃於一家元貞初旌之

胡光遠太平人母喪廬墓一夕夢母欲食魚晨起號天

將求魚以祭見生魚五尾列墓前俱有嚙痕鄰里驚異  
方聚觀有獺出草中浮水去知為獺所獻以狀聞於官  
表其閭至順間有永平龐遵者母病腫三年不能起忽  
思食魚遵求之市不得歸途歎恨忽有鯉躍入其舟作  
羹以獻母悅病瘥

陳韶孫廣州番禺人父瀏以罪流肇州韶孫年十歲朝  
夕號泣願從父不能奪遂與俱往跋涉萬里過遼陽平  
章達春見而憫之曰邊地苦寒非汝所堪吾當返汝故

鄉韶孫曰既不能以身代父當死生以之歸非所願也  
大德六年溺死韶孫哀慟見者皆為泣下肇州萬戶府  
以聞命還鄉里仍旌異之

李忠晉寧人幼孤事母至孝大德七年地大震郇保山  
移所過居民廬舍皆摧壓傾圮將近忠家分為二行五  
十餘步復合忠家獨完吳國寶雷州人性孝友父喪廬  
墓大德八年境內蝗害稼惟國寶田無損人皆以為孝  
感所致

李茂大名人徙家揚州父興壽臨卒語茂曰吾病且死  
爾善事母茂泣受命奉母益謹母嘗病目失明茂禱於  
泰安山三年復明又願母壽每夕祝天乞損己年益母  
算享年八十四大德九年揚州再火延燒千餘家火及  
茂廬皆風返而滅事聞旌之

羊仁廬州廬江人至元初阿珠兵南下仁父被殺母及  
兄弟皆掠去時仁方七歲賣為汴人李子安家奴力作  
二十餘年子安憐之縱為良仁遂遍訪得母於潁州兄

於睢州弟於邯鄲皆幸無恙乃遍懇親故貸得鈔百錠歷詣諸家求贖之經營百計更六年大小二十餘口復得完聚又有黃覺經建昌人五歲遭亂失母稍長誓天願求母所在乃渡江涉淮行乞而往至汝州梁縣春店得其母以歸章卿孫蜀人本劉氏幼為章提刑養子與母相失三十八年遍訪於江西諸郡迎歸養之俞全杭州人幼被掠賣為劉熊家奴後獲為良自汴步歸杭尋其母及姊得之事母以孝聞李鵬飛池州人生母姚氏

為嫡母不容改嫁於朱氏鵬飛幼不知也年十九思慕  
哀痛願早見母行求三歲至蘄州羅田縣得馬迎還奉  
養久之復歸朱氏時渡江省覲既卒歲時攜子孫往祭  
墓並以有司所請旌其閭

趙一德隆興新建人初元兵南伐被俘至燕為鄭留守  
家奴歷事三世號忠幹一日拜請於其主鄭阿爾斯蘭  
及其母澤國太夫人曰一德自去父母依門下者三十  
餘年矣故鄉萬里未獲歸省雖思慕刻骨未嘗敢言今



父母已老脫有不幸則永為天地間罪人矣因伏地涕泣不能起鄭母子皆感動許之歸期一歲而返比至父兄已沒惟母在年八十餘一德卜地葬二柩畢欲少留事母懼得罪如期還燕鄭母子歎其孝即裂券縱為良將辭歸會阿爾斯蘭以冤被誅詔簿錄其家衆各亡散一德獨奮然留不去與張錦童詣中書訴枉狀得還所籍鄭母勞之曰常吏籍吾家時親戚不相顧汝獨冒險以白吾枉疾風勁草豈易見者因分美田廬遺之謝曰一德雖

鄙人非有利於是也重哀吾主無罪而受戮故留此以報主今老母八十餘得歸侍養主之賜已厚矣遂不受而去皇慶元年旌其閭

王思聰延安塞人素力田農隙則教諸生得束脩以養親母喪盡哀事繼母如所生以家多幼稚侵父食別築室曰養老堂奉之朝夕定省無間父嘗病劇思聰拜祈於天得神泉飲之愈後復失明思聰舐之即能視縣上狀命表異之

徹辰台奎蘓氏幼喪父事母篤孝母歿水漿不入口者三日每節序祭祀哭泣常如祖姑時年四十餘每見人父母輒咽鳴流涕問其故曰人皆有父母我獨無是以悲耳至大三年寢異

王初應漳州長泰人至大四年從父義士樵劉嶺山有虎出叢棘中搏其父傷右肩初應奮救抽鑣刃刺虎鼻殺之義士得生泰定二年同縣施合德父真祐嘗出耘為虎扼於田合德與從弟發仔持斧前殺虎父獲甦並

旌其門

鄭文嗣婺州浦江人其家十世同居凡二百四十餘年  
一錢尺帛無敢私至大間表其門文嗣歿從弟大和繼  
主家事益嚴而有恩家庭中凜如公府子弟有過頒白  
者猶鞭之每遇歲時大和坐堂上羣子弟皆盛衣冠雁  
行立左序下以次進拜跪奉觴上壽畢皆肅容拱手自  
右趨出足武相銜無敢參差者部使者余闕為書東浙  
第一家以褒之大和方正不奉浮屠老子教冠婚喪祭

必稽朱熹家禮而行執親喪三年不御酒肉子孫從化  
皆孝謹雖仕宦不敢一毫有違家法諸婦唯事女工不  
使預家政家畜兩馬一出則一為之不食人以為孝義

所感有家範三卷傳於世

按宋濂文集云浦江義門鄭深字仲幾素讀書負氣開太

師托克托喜士即走見之與語大悅使其子哈喇章師  
事焉一日皇太子至深以孝經進賜錦衣一襲至正八  
年授長史當托克托之被誅西寧也門下客盡散獨深  
聞王梅時過之深數道其賢托克托曰梅屢短君而居  
反賢之何也深曰賢之者以其知義耳若深所短梅正  
當言能言所以為益賢也托克托曰當今安得有此長  
者之言十年遷宣文閣授經郎召見明仁殿問深家同  
居事屢歎以為嘉瑞顧皇子書麟鳳二字以美之並賜

新刻智永千文一卷時從弟清方為經筵檢討每進講殿中兄弟連翩而入時人以為榮元史本傳不載

王薦福寧人父疾夜禱於天願減己年益父壽父絕而復甦告其友曰適有神人黃衣紅帕首恍惚語我曰汝子孝上帝命錫汝十二齡疾遂愈後果十二年而卒母沈氏病渴思食瓜時冬月求於鄉不得行至深奧嶺值大雪薦避雪樹下仰天而哭忽見巖石間青蔓離披有二瓜因摘歸奉母母食之渴頓止兄孟軻早世嫂林氏更適劉仲山仲山嘗以田鬻於薦及死不得葬且無子

族以其貧莫肯為之後薦即以田還之使置後且治葬具州禁民死不葬者貧民畏令悉焚柩棄骨野中薦置地為義阡收瘞焉有死不能斂者復買棺以贈至大四年其鄉旱民艱糴薦盡出儲粟賑之有施福等十一家飢欲死薦家粟已竭即以己田易穀百石以濟福建宣慰司上狀旌之

郭全遼陽人幼喪母哀戚如成人及壯父庭玉平居廬三載繼母唐古氏生四子皆幼全躬耕以養既長娶婦

各求分財異居全不能止凡田廬器物悉自取朽弊者  
唐古氏卒全年六十餘哀痛毀瘠廬其墓終喪又有劉  
德奉元人事繼母如所生家貧傭工取值寸錢尺帛皆  
上之四弟並繼母出德撫愛尤篤年五十未娶稱貸得  
錢先為弟求婦諸弟亦化其德一門藹然鄉里稱為劉  
佛子瑪雅哈伊嚕勒昆氏素貧事繼母張氏庶母呂氏  
克盡子職劉居敬大都人年十歲繼母郝氏病居敬憂  
之懇天以求代狀聞並褒美之



楊皞扶風人父清母牛氏牛氏嘗病劇皞叩天求代遂  
痊如是者再後牛氏失明皞登太白山取神泉洗之復  
如故牛氏歿哀毀特甚葬之日大雨獨皞墓前後數里  
密雲蔽之雨不沾土葬畢令妻衛氏家居養清皞獨廬  
墓上負土為墳蔬食飲水終其喪清卒亦如之

丁文忠許州偃城人業鼓冶母和氏疾與弟文孝竭力  
調侍母卒文忠廬墓側不與妻面者三年父貴又疾醫  
不能療文忠造車一輛兄弟共御之載父禱於嵩山五

臺泰安河濱諸祠途遇異僧遺藥而愈延祐七年旌之  
邵敬祖宛丘人父喪廬墓母繼歿河決不克葬殯於城  
西敬祖露宿依其側風雨不去友人哀之為縛草舍庇  
焉前後居廬六年兩髀俱成濕疾至治三年旌其家又  
有永平李彥忠父喪廬墓八年不至家茶陵譚景星幼  
失父追念之廬其墓十年亳州郭成年七十一母喪食  
粥廬墓一年朝夕哭臨人哀其老而能孝

扈鐸汴梁蘭陽人蚤孤育於伯父及長事之如所生

伯父老無子鐸為買妾歲餘產一女其妾熟寐壓女死久之伯父死遺腹生一男鐸懲前失告其母及妻妹護視之已復廬戶外不敢安寢弟能食常自抱哺與同卧起十年不少忘弟有疾鐸夜稽顙星斗哀禱曰天不伐余家鐸父子間可去一人勿喪吾弟使伯父無後也明旦弟愈母卒廬於墓側宗族勸之歸鐸曰今歲凶多盜吾家雖貧安知墓中無可欲乎倘驚吾親之靈雖生何為卒守廬不去

孫秀實大寧人性喜周急里人王仲和嘗托秀實貸富人鈔二千錠貧不能償棄其親逃去數年不歸其親思之疾秀實日饋薪米存問終不樂秀實哀之悉為代償取券還其親復命奴賣金訪仲和使歸父子歡聚又有賈進大同人大德九年地震民居多傷且乏食進給酒藥炭米濟之每歲冬製木棉裘數百襲衣寒者買地為義阡使無墓者葬焉李子敬陝西三原人嫁不能嫁者五十餘人葬不能葬者五十餘喪焚逋券四萬餘貫有

司以名聞並旌之

按元史本門曰孝友而秀實等三人皆以義行附傳亦推廣孝行錫類之

意今仍存之

宗祀大都人年十九父卒僻踊號泣絕而復甦水漿不入口者三日遂成疾伏卧牀榻猶哭不止淚盡繼之以血既瘳疾轉甚祀有繼母作遺書囑其妻楊氏曰汝善守志以事吾母遂卒楊氏遺腹生一男人以為孝感天不絕其嗣云奉定三年旌其門

趙榮扶風人母強氏有疾割股肉啖之者三復負母登

太白山禱於神得聖水飲之乃痊後年七十五卒榮號  
痛不食者七日葬之日白雲庇其墓前後十五里負土  
成墳廬其側終喪

吳好直華州蒲城人父歿事繼母盡孝兄弟嘗求分財  
好直勸諭不能止即以己所當得悉推與之又有甄城柴  
郁陳舜咨皆能孝友以己產分讓兄弟縣令言狀並表  
異之

余丙建德遂安人幼喪母泣血成疾父亡不忍葬結廬

古山下殯其中日閉戶守視有牧童遺火延殯廬而與子慈亟撲不止欲投身火中與柩俱焚俄暴雨火滅

徐珏鎮江人弱冠侍父鎮之婺源過丹陽小谿父乘橋失足墮水中珏投谿擁父出得挽行舟以升珏力僅且勢湍急遂溺死江浙行省言狀表異之

尹莘

按一統志作尹莘通考作尹莘

汴梁洧川人至治初遊學京師夢

母疾即馳歸母已亡居廬蔬食哀毀骨立父輔臣嘗病疫莘嘗其糞以驗差劇夜禱於天曰母亡不能見父病

不能治為人子若此何以自立於世願死以代父命數  
日而愈又有高唐孫希賢母病痢希賢閱方書有曰血  
溫身熱者死血冷身涼者生希賢嘗之其血溫乃號泣  
祈天求身代之母遂愈高郵卜勝榮母痢不能樂日嘗  
痢以求愈兄疾禮北辰乞減己年延之並痊

劉廷讓大寧武平人至順初上郡兵起廷讓挈家避山  
中有幼弟方乳母王氏置於懷兵至廷讓乃棄己子一  
手抱弟一手扶母疾驅得免事聞旌之



劉通亳州譙縣人母卜氏目失明通誓斷酒肉禱之三十年不懈卜氏年八十五忽復明至大間都陽黃鑑皇慶間諸暨丁祥一皆以親喪明以舌舐之復能視並命褒表

張旺舅安豐霍丘人幼失父母陳氏居貧守志旺舅九歲賣錫以養及長母病伏枕數月日夜痛哭禮天求代未幾遂愈又自以生業微不能多給竟不娶以終母年縣令言於朝旌之

張思孝華州人母喪以孝聞父疾不愈潔齋致禱乞以  
身代未幾遂痊至順三年表其門

杜佑邠州人為河南水馬站提領父成病於家佑忍心  
驚舉體沾汗即棄職歸禱神求代且嘗冀以驗疾父卒  
廬墓盡哀有馴兔之瑞

長壽父特殊官平章政事生五子長山壽早世次即長  
壽次永壽福壽蒙古哈雅元統間特殊歿長壽哀毀盡  
禮服闋當蔭叙與弟羅拜母前曰吾父廉貧諸弟未有

所立願以職讓永壽永壽讓福壽福壽曰二兄能讓福壽獨不能耶以讓蒙古哈雅母從之蒙古哈雅遂告蔭為太禧宗禋院神御殿侍禮佐郎兄弟奉母尤篤至大間河中梁威遜親喪廬墓兄諾海為鄂囉官自以遠仕不得養其親即棄職舉威遜代之人稱威遜能孝諾海能義又有輝和爾氏齊哩克及濠州高中嘉定武進皆以侍親不願仕以祖父蔭讓叔父昆弟

孫瑾鎮江丹徒人父喪停柩四載衣不解帶及葬載柩

渡江潮波方湧俄順風翼帆如履平地事繼母唐氏尤  
孝嘗患癰瑾親吮之又喪目舐之復明唐氏卒卜日將  
葬時春苦雨瑾夜號天乞霽至旦雲日開朗甫掩壙陰  
氣復合雨注數日不止又有吳希曾睢寧人葬父日大  
雨希曾跪柩前炷艾燃腕火熾雨止既葬廬於墓左縣  
上狀並旌之

張恭河南偃師人以兵部符署鷹坊府案牘親老辭歸  
侍養父喪過哀侍母馮氏尤謹歲凶恭夫婦采野菜為

食而營奉甘旨無乏母有疾恭手除溷穢喂哺飲食且嘗糞以驗疾勢天厯初西兵至河南恭守視母病項中一劍不去母驚悸而歿居喪盡禮有詔旌其閭

訾汝道德州齊河人父興卒居喪以孝聞母高氏治家嚴汝道承順甚恭母嘗寢疾晝夜不去側母卒哀毀終喪不御酒肉性尤友愛二弟將析居悉以美田廬讓之二弟早世撫諸孤如己子里中嘗大疫有食瓜得汗而愈者汝道即多市瓜及攜米歷戶饋之有死者復贈以

櫨積當出麥粟貸人至秋蝗食稼人無以償汝道取其  
券焚之縣令李讓為請旌其家

王庸字伯常雄州歸信人事母李氏以孝聞母有疾夜  
禱北辰至叩頭出血遂愈及母卒哀毀幾絕露處墓前  
旦夕悲號一夕雷雨暴至鄰人持寢席往蔽之見庸坐  
卧地獨不濡濕咸歎異而去

黃贊字止敬臨江人父君道延祐間求官京師留贊江  
南時贊年尚幼及長聞父娶後妻居永平徃省之父歿

已三年矣後母聞贊來盡挾其貲更嫁拒不見贊贊號  
哭語人曰吾之來為省父也今不幸父歿思奉其柩歸  
而窆之莫知其墓苟見母示以葬所死不恨矣尚忍利  
遺財耶久之聞母居海濱亟裹糧往復拒納母之弟  
憐之與偕至永平求其父墓又弗得贊哭禱於神一夕  
夢老父以杖指葬處曰見片磚即可得明日就其地求  
得父骨以歸

石明三與母居餘姚山中一日自外歸覓母不見卧內

有三虎子知母為虎所害乃盡殺虎子礪巨斧立壁側伺母虎至斫其腦裂而死復往倚巖石旁執斧伺候斫殺壯虎明三亦立死不仆張目如生

劉琦

通考作張琦

岳州臨湘人生二歲遭亂母劉氏陷於兵

琦獨事其父稍長思母不置常歎曰人皆有母我獨無輒歔欷泣下及冠請於父往求其母得於池州之貴池迎以歸養後父母歿終喪猶蔬食有司上其事旌表其門曰孝義



劉源歸德中牟人母吳氏年七十餘衰病不能行通火  
起源力不能救呼天號泣趨入抱母為火所災而死  
祝公榮字大昌處州麗水人隱居養親事母甚孝母歿  
居喪盡禮竈突失火公榮力不能救乃伏棺悲哭其火  
自滅

陸思孝紹興山陰樵者母老病痢方欲剖股肉為糜以  
進忽夢寐間有神人授以藥劑得而異之即以奉母其  
疾遂愈

姜蕙嚴州淳安人七歲而孤養母至孝母死哀慕幾絕  
既葬獨居墓下朝夕哭奠蔬食飲水一哀麻寒暑不易  
同里陳氏戴氏子不能事其父母聞蕙之行皆感悔迎  
養

胡伴侶鉤州密縣人父實嘗患心疾更數醫莫能療伴  
侶乃齋沐焚香泣告於天於右脇旁割脂一片和藥以進  
父疾遂瘳其傷亦旋愈詔旌其門

王士弘延安中部人父搏有疾士弘傾家貲求醫見醫

即拜遍禱諸神扣額成瘡父歿哀毀盡禮廬墓三年足  
未嘗至家墓廬上有奇鵲來巢終喪復建祠於塋前朔  
望必往奠祭雖風雨不廢有司上其事於朝旌表之

何從義延安洛川人祖良祖母李氏偕亡從義廬於墓  
側旦夕哀慕不脫衰絰惟啖蔬食事父世榮母王氏孝  
養尤至伯叔祖母及叔父母皆無子比其亡也咸為治  
葬築高墳祭奠以禮

阿都齊大都固安人母嘗有疾醫治不痊礪其所佩小

刀拜天泣曰慈母生我劬勞今當捐身報之遂割開左脇取肉一片作羹進母數日而愈

高必達建昌人五歲時父明大棄家遠遊莫知所適既長晝夜哀慕乃娶妻以養母歷往四方求之十餘年不得見心愈悲忽相傳黃州全真道院中有虛明子者學道三十年矣本姓高氏建昌人也必達詢知為父即往拜之具言家世及己之所生歲月哀號叩頭不已虛明瞑坐不顧久之斥曰我非汝父不去何為必達留侍左

右不少懈辭氣哀惻其徒請曰師有子如此忍弗歸乎  
虛明不得已乃還家

曾德漁陽人宗聖公五十七代孫母早亡父仲祥繼娶  
左氏遊襄陽樂其土俗因攜左氏家焉會兵亂遂失左  
氏德遍求五年得於廣海間奉迎以歸孝養備至有司  
以聞詔旌復其家

靳曷字克昌絳州曲沃人兄榮為奎章閣學士奉母王  
氏居京師母歿曷與兄護喪還家至平定大雨水驟至

曷伏柩上遂沒於水詔賜孝子靳曷碑

黃道賢泉州人嫡母唐氏無子道賢在襁褓而生母賴氏以疾去既長思慕生母屢請於父召之歸養二母得其歡心父病篤晝夜奉湯藥遍求良醫莫效乃夜禱於天願減己年一紀以益父壽疾遂愈元統二年乃歿果符其數道賢居喪盡禮負土築墳廬於墓側蔬食終制有司上其事旌其門

史彥斌邳州人嗜學有至性至正十四年河溢金鄉魚

臺墳墓多壞適彥斌母年為厚棺刻銘其上仍釘以四鐵環然後葬明年墓為水所漂彥斌縛草為人置水中仰天呼曰母棺被水不知其處願天矜憐假此芻靈指示母棺即乘舟隨草人所之行十餘日草人止桑林中視之母柩在焉載歸復葬之

張紹祖字子讓潁州人讀書力學以孝行聞於朝特授河南路儒學教授至正十五年奉父避兵山間賊至執其父將殺之紹祖乞請殺己以代父且曰若等非父母

所生乎何忍害人父也賊怒以戈擊之戈應手挫折因感而相謂曰此真孝子不可害乃釋之去

李明德瑞州路上高縣人讀書有志操至正十四年亂兵執其父欲殺之明德泣告曰子豈不能代父乎願勿害吾父也兵遂殺明德而免其父

張緝字士明益都膠州人性孝友能詩文至正七年與兄紳弟經同領鄉薦由澤州儒學正轉泰州幕職棄歸養親居揚州十五年揚州亂緝母姬氏方卧病賊突入



卧内舉鎗欲刺緝以自蔽母鎗中緝脇三日而死

魏敬益字士友雄州容城人性至孝居母喪哀毀骨立  
素好施與有田十六頃語其子曰自吾買四莊村之田  
十頃其村民皆不能自給今將以其田歸其人汝謹守  
餘田可無餒也乃呼村民歸之衆皆愕眙不敢受卒與  
之有司以聞加旌表

湯霖字伯雨隆興新建人早喪父事母至孝母嘗病  
熱不肯飲藥曰惟得冰我疾乃可愈時天甚燠霖累日

號哭於池上忽聞池中夏夏有聲拭淚視之乃冰漸也  
亟取以奉母其疾果愈

孫抑字希武晉寧洪洞縣人登進士第歷官刑部郎中  
闕保之變挈父母妻子避兵平陽之柏村有亂兵拔白  
刃嚇其母求財不得舉刃欲斫之抑急以身蔽請代受  
斫母乃得釋而父被掠不知所之或語人曰汝父被驅  
而東矣東軍得所掠民皆殺之無往就死也抑曰可畏  
死而棄其父乎遂往出入死地屢瀕危殆卒得父以歸

石永紹興新昌人亂兵掠鄉里永父謙孫年八十老不能行乃負父匿山谷中亂兵執其父欲殺之永坐前抱父請代兵遂殺永其父獲免

王克己延安中部人父伯通歿負土築墳廬於墓側摩該縱兵暴掠守墓不去俄兵至見其身衣衰絰形容憔悴曰此孝子也遂不忍害終喪而歸


劉思敬延安宜君人事繼母沙氏杜氏如所生父年八十兩目喪明會兵亂負父避巖穴中兵至欲殺之思敬

泣曰我父老矣又無目我死不足惜使我父何依乎兵  
憐其孝皆舍之

呂祐字伯通晉安人至正二十六年郡城陷有卒入室  
拔白刃脅其母林氏索財寶不得揮刃欲斫之祐急以身  
蔽之奪其刃手指盡落被傷仆地良久而甦開目視母  
曰母幸無恙我死無憾矣遂瞑目死

周樂温州瑞安人宋狀元坦之後海賊據温州拘其父  
日成置海舟上樂隨往賊酋遣人沈日成於水樂泣請

曰我有祖母幸留父侍養請以已代不聽遂抱父同死  
馬



欽定續通志卷五百二十六

欽定四庫全書

史部

欽定續通志卷五十九

七十九

侍講學士<sub>臣</sub>羅國俊覆勘

總校官原任侍講<sub>臣</sub>王燕緒

欽定四庫全書

欽定續通志卷五十七

獨行傳

臣等謹案獨行傳唐書宋史俱作卓行五代史作一行今依鄭志改稱獨行其有自他類移入諸人亦取其立志孤行而名實相副者金元兩史則仍其闕云

唐

元德秀

李翱

權皋

甄濟

逢

吳保安

郭仲翔

陽城

何蕃

司空圖

元德秀字紫芝河南人質厚少緣飾少孤事母孝舉進

士不忍去左右自負母入京師既擢第母亡廬墓側食

不鹽酪藉無茵席

按舊書於此下載有刺血畫像罵佛經等事李華所撰元魯山墓碣亦同

謹附

服除以宴困調南和尉有惠政擢補龍武軍錄事

參軍德秀不及親在而娶不肯婚人以為不可絕嗣答

曰兄有子先人得祀吾何娶為初兄子襁褓喪母無資得



乳媪德秀自乳之數日湏沅能食乃止既長將為娶家  
苦貧乃求為魯山令前此墮車足傷不能趨拜太守待  
以客禮有盜繫獄會虎為暴盜請格虎自贖許之明日  
盜尸虎還舉縣嗟歎玄宗在東都酺五鳳樓下命三百  
里縣令刺史各以聲樂集河內太守輦優伎數百被錦  
繡或作犀象瓊瑤光麗德秀惟樂工數十人通鑑作數人聯  
袂歌于為于按通鑑考異引明皇雜錄作于為未詳其義今考權德輿詩云且讀魯山于為于可  
為傳文于為于者德秀所為歌也帝聞異之歎曰賢人  
之證

之言哉謂宰相曰河內人其塗炭乎乃黜太守德秀益  
知名所得奉祿悉衣食人之孤遺者歲滿筭餘一緡駕  
柴車去愛陸渾佳山水乃定居不為牆垣局鑰家無僕  
妾歲饑日或不爨嗜酒陶然彈琴以自娛人以酒肴從  
之不問賢鄙為酣飫是時程休邢宇宇弟宙張茂之李  
粵粵族子丹叔惟岳喬潭楊拯房垂柳識皆號門弟子  
德秀善文辭作塞士賦以自況房瑄見而歎曰見紫芝  
眉宇使人名利之心都盡蘇源明曰吾不幸生衰俗所

不恥者識元紫芝也天寶十三載卒家惟枕履簞瓢而已  
潭時為陸渾尉庀其葬族弟結哭之慟或曰子哭過  
哀禮歟結曰若知禮之過而不知情之至大夫弱無固  
性無專老無在死無餘人情所耽溺喜愛可惡者大夫  
無之生六十年未嘗識女色視錦繡未嘗求足無苟辭  
佚色未嘗有十畝之地十尺之舍十歲之僮未嘗完布  
帛而衣具五味之餐吾哀之以戒荒淫貪佞綺紈膏粱  
之徒耳李華兄事德秀及卒華謚之曰文行先生

舊書  
作門

人臨新書作華誼宋李華  
兄事德秀則非門人也

天下高其行不名謂之元魯

山休字士美廣平人字字紹宗宙字次宗河間人茂之  
字季豐南陽人寧字伯高丹叔字南誠惟岳字謨道趙  
人潭字子源梁人垂字翼明清河人拯字齊物隋觀德  
王雄後舉進士終右驍衛騎曹參軍寧擢制科遷南華  
令大水他縣饑人至相屬寧為具餐幣及去糗糧送之  
吏為立碑安祿山亂寧客清河為乞師平原太守顏真  
卿一郡獲全歷廬州刺史拯與寧名最著潭識以文傳

後

權臯字士繇秦州畧陽人徙潤州丹徒晉安丘公翼十  
二世孫父倕與席豫蘇源明以藝文相友終羽林軍參  
軍臯擢進士第為臨清尉安祿山籍其名表為薊尉署  
幕府臯度祿山且叛欲行慮禍及親天寶十四載使獻  
俘京師還密與妹婿福昌尉仲謩約以疾召之謩來臯  
陽嚙直視謩而瞑謩為盡哀自含歛之臯逸去人無知  
者吏以詔書還臯母母謂實死慟哭感行路故祿山不

之虞歸其母臯潛候于淇門奉侍晝夜南奔客臨淮為驛亭保以訶北方既渡江而祿山反天下聞其名爭取以為屬高適表試大理評事淮南採訪判官永王舉兵脅士大夫臯詭姓名以免玄宗在蜀聞之拜監察御史會母喪得風痺疾客洪州南北梗否踰年詔命不至有中人過州頗求取無厭南昌令王邁欲按之謀于臯臯良久不答泣曰今何由致天子使而遽欲治之邁悟厚謝浙西節度使顏真卿表為行軍司馬召拜起居舍人

固辭嘗曰吾潔身亂世以全吾志欲持是受名邪李季卿為江淮黜陟使列其高行以著作郎召亦不就自中原亂士人率渡江李華柳識韓洄王定皆仰臯節與友善洄定常評臯可為宰輔師保華亦以為分天下善惡一人而已卒洄等制服行哭詔贈秘書少監元和中謚為貞孝子德輿至宰相別傳

甄濟字孟成定州無極人叔父為幽涼二州都督家衛州宗屬以伉俠相矜濟少孤獨好學以文雅稱居青巖

山十餘年遠近服其仁環山不敢畋漁採訪使苗晉卿表之諸府五辟詔十至堅卧不起天寶十載以左拾遺召未至而安祿山入朝求濟于玄宗授大理評事范陽掌書記濟不得已為起居府中論議正直久之察祿山有反謀不可諫濟素善衛令齊玘因謁歸具告以誠偽作歐血不支舁歸舊廬祿山反使蔡希德封刀召之曰即不起斷其頭見我濟色不動左手書曰不可以行使者持刀趨前濟引頸待之希德嗟歎以實告病後慶緒



復使彊輿至東都安國觀會廣平王平東都濟詣軍門  
上謁泣涕王為感動肅宗詔館之三司署使汙賊官羅  
拜以媿其心授秘書郎更拜太子舍人來瑱辟為陝西

襄陽參謀拜禮部員外郎

舊書實應初拜  
刑部員外郎

大厯初江西

節度使魏少游表為著作郎兼侍御史卒子逢幼孤及  
長耕宜城野自力讀書不謁州縣歲饑節用以給親里  
大穰則振其餘于鄉黨貧狹者朋友有緩急輒出家貲  
周贍以義聞逢常以父名不得在國史欲詣京師自言

元和中袁滋表濟節行與權臯同科宜載國史有詔贈  
濟秘書少監逢友人元稹與史館修撰韓愈並稱濟之  
忠與逢之行由是父子俱顯名

吳保安字永固魏州人氣挺特不俗睿宗時姚萇蠻叛  
拜李蒙為姚州都督宰相郭元振託以弟之子仲翔蒙  
表為判官時保安罷義安尉未得調與仲翔同里仲翔  
力薦之蒙表掌書記保安後往蒙已深入與蠻戰没仲  
翔被執蠻厚責千緡以贖會元振物故保安留雋州營

贖仲翔十年得縑七百妻子客遂州間闕求保安所在  
困姚州不能進都督楊安居知狀貸以官貲始滿千得  
仲翔以歸始仲翔為蠻所奴三逃三獲乃轉鬻遠酋嚴  
遇之畫役夜囚役凡十五年乃還安居嘉保安之誼厚  
禮仲翔檄領近縣尉遷代州戶曹母喪服除喟曰吾賴  
吳公生吾死今親歿可行其志乃求保安時保安以彭  
山丞客死其妻亦沒喪不克歸仲翔為服縗經囊其骨  
徒跣負之歸葬魏州廬墓三年乃去後為嵐州長史迎

保安子為娶而讓以官

按吳保安棄家拯友誠為卓行郭仲翔亦能報德新書列之忠

義今

改正

陽城字亢宗定州北平人徙陝州夏縣好學貧不能得書求為集賢院吏竊書讀之六年無所不通及進士第乃去隱中條山與弟堦域常易衣出年長不肯娶謂弟曰吾與若孤惻相育既娶則間外姓雖共處而益疏我不忍弟義之亦不娶遂終身城謙恭簡素遇人長幼如一遠近慕其行來學者跡接于道閭里有爭訟詣城決之

有盜其樹者城過之慮其恥退自匿寡妹依城居其子  
年四十餘癡不知人城常負以出入始妹之夫客死遠  
方城與弟行千里負其柩歸葬歲饑屏跡不過隣里屑  
榆為粥講論不輟山東節度府聞城義者發使遺五百  
緡城固辭使者委而去城置之未嘗發會里人鄭俶欲  
葬親貸于人無得城知其然舉緡與之俶願為奴以償  
德城教以書俶不能業慙縊而死城驚哭自咎為服總  
麻瘞之陝虢觀察使李泌數禮餉城欲辟致之府不起

乃薦諸朝以著作佐郎召城固辭泌不敢强及為宰相

又言之德宗拜右諫議大夫

按舊書作觀察使李泌聞其名詣訪之及為相薦為

著作郎遣楊寧東帛召赴京持章服衣之還諫議大夫與新書稍異初城未起搢紳想見

風采及受命它諫官論事紛紛而城猶未肯言韓愈作

爭臣論譏切之城不屑意方與二弟及客日夜劇飲客

欲諫止者城即彊飲之或醉仆席上城或先醉卧客懷

中不能聽客語無得闕言常以木枕布衾質錢人重其

賢爭售之每約二弟吾所俸入而可度月米幾何薪菜

鹽幾錢先具之餘送酒家無留也服用無贏副客或稱其佳可愛輒舉授之居位八年人不能窺其際及裴延齡誣逐陸贄張滂李充等帝怒甚無敢言城聞曰吾諫官不可令天子殺無罪大臣乃約拾遺王仲舒歸登右補闕熊執易崔郾守延英閣上疏極論延齡罪申直贄等累日不止帝大怒召宰相抵城罪順宗方為皇太子為開救良久得免然帝意不已欲逐相延齡城顯語曰延齡為相吾當取白麻壞之哭于廷

案通鑑城盡疏延齡過罪欲密論之

與李沁之子繁使之繕寫繁徑以造延齡延齡先一一自疏上以為妄不之罪帝不相延齡城力也坐是下遷國子司業引諸生告之曰凡學者所以學為忠與孝也諸生有久不省親者乎明日謁城還養者二十輩有三年不歸侍者斤之簡孝秀德行升堂上沈酗不率教者皆罷躬講經籍生徒斤斤皆有法度薛約者狂而直言事得罪謫連州吏捕迹得之城家城坐吏于門引約飲食訖步至都外與別帝惡城黨有罪出為道州刺史太學諸生何蕃李儼王魯卿李讜等二百



人按柳宗元陽公遺愛碣作百六十人頓首闕下請留

城柳宗元遺蕃等書慙忠之蕃等守闕下數日為吏遮

抑不得上

按柳宗元陽公遺愛碣云翌日會徒北向如初行至延禧門公使追奪其章遮道願罷遂

不果獻蓋飾詞耳

既行皆泣涕立石紀德至道州治民如治家

不以簿書介意月俸取足則已官收其餘州產侏儒歲

貢諸朝城奏曰州民盡短若以貢不知何者可供自是

罷州人感之以陽名子前刺史坐罪下獄吏有幸于刺

使者拾不法事告城欲自脫城輒榜殺之賦稅不時觀

察使數誚責城自署其考曰撫字心勞追科政拙考下  
下觀察府遣判官督賦至州城先自囚于獄判官驚馳  
入謁城不敢歸判官遽辭去府復遣他判官來按判官  
載妻子中道逃去順宗立召還城而城已卒贈左散騎  
常侍賜其家錢二十萬官護喪歸葬蕃和州人事父母  
孝學太學歲一歸父母不許凡五歲慨然以親且老不  
自安揖諸生去乃共閉蕃空舍中衆共狀蕃義行白城  
請留會城罷亦止初朱泚反諸生將從亂蕃正色叱不聽

故六館之士無受汙者蕃居太學二十年有死喪無歸者皆身為治喪償魯人魯卿第進士有名

司空圖字表聖河中虞鄉人

舊書作本臨淄人

父興有風幹當

大中時為安邑兩池榷鹽使立條約衆以為宜以勞再遷戶部郎中圖咸通末擢進士禮部侍郎王凝特所獎待凝坐法貶商州圖感知已往從之凝起拜宣歙觀察使乃辟置幕府召為殿中侍御史不忍去凝府臺劾左遷光祿寺主簿分司東都盧携以故宰相居洛嘉圖節常

與遊攜還屬于陝號觀察使盧渥即表為僚佐會携復  
執政召拜禮部員外郎尋遷郎中黃巢陷長安將奔不  
得前圖弟有奴段章者陷賊執圖手曰我所主張將軍  
喜下士可往見之圖不肯往遂奔咸陽問關至河中

案舊

書本傳故相王徽與圖厚數年徽受詔鎮潞  
表圖為副使以徽不赴鎮而止新傳未載僖宗次鳳

翔即行在拜知制誥遷中書舍人後狩寶雞不獲從又  
還河中龍紀初復拜舊官以疾解景福中拜諫議大夫  
不赴後再以戶部侍郎召身謝闕下數日即引去昭宗

在華召拜兵部侍郎以足疾固自乞會遷洛陽柳璨希  
賊臣意誅天下才望詔圖入朝圖猗墮笏趣意野耄乃  
聽還圖本居中條山王官谷有先人田遂隱不出作亭  
觀素室悉圖唐興節士文人名亭曰休休作文以見志  
曰休美也既休而美具故量才一宜休揣分二宜休耄  
而贖三宜休又少也情長也率老也迂三者非濟時用  
則又宜休因自目為知非子耐辱居士其言詭激不常  
以免當時禍災云豫為冢棺遇勝日引客坐壙中賦詩

酌酒裴回每歲時祠禱鼓舞圖與閭里耆老相樂王重  
榮父子雅重之數饋遺弗受嘗為作碑贈絹數千圖置  
虞鄉市人得取之一日盡時寇盜所過殘暴獨不入王  
官谷士人依以避難朱全忠已篡召為禮部尚書不起  
哀帝弑圖聞不食而卒圖無子以甥為嗣嘗為御史所  
劾昭宗不責也

五代

石昂

程福贊

石昂青州臨淄人家有書數千卷喜延四方之士士無遠近多就昂學問食其門下者或累歲昂未嘗有怠色而昂不求仕進節度使符習高其行召為臨淄令習入朝京師監軍楊彥朗知留後事昂以公事至府上謁贊者以彥朗諱石更其姓曰石昂趨于庭仰責彥朗曰內侍奈何以私害公昂姓石非石也彥朗大怒拂衣起去昂即趨出解官還家語其子曰吾本不欲仕亂世果為刑人所辱子孫其以我為戒昂父亦好學平生不喜佛說

父死昂于柩前誦尚書曰此吾先人所欲聞也禁其家不可以佛事污吾先人晉高祖時詔天下求孝悌之士戶部尚書王權等相與上昂行義詔昂至京師召見便殿以為宗正丞遷少卿出帝即位晉政日壞昂數上疏極諫不聽乃稱疾東歸終于家

程福贊者不知其世家為人沈厚寡言而有勇少為軍卒以戰功累遷洺州團練使晉出帝時為奉國右廂都指揮使開運中契丹入侵出帝北巡奉國軍士乘間夜



縱火焚營欲因以為亂福贊身自救火被傷火滅而亂者不得發福贊以為契丹且大至而天子在軍京師虛空不宜以小故動搖人聽因匿其事不以聞軍將李殷位次福贊下利其去而代之因誣福贊與亂者同謀不然何以不奏出帝下福贊獄人皆以為冤福贊終不自辨以見殺

欽定續通志卷五百二十七